

Buraai Yā Accħaaī

Iħnejel : Yuhannā 18:1-40, 19:1-6

Īsā^(a.s) ibaadat karne ke baad apne shaagirdoñ ke saath Kirdoñ naam kī ek waadī ko paar kar ke ek baaġ me pahuñche. ⁽¹⁾ Īsā^(a.s) kā shaagird Yahudā unko dhokā dene ke liye wahaañ se jā chukā thā. Wo jaantā thā ki ye jagah kahaan̄ hai kyuñki Īsā^(a.s) apne shaagirdoñ se wahaañ par kaī baar mil chuke the. ⁽²⁾ Yahudā Romī faujiyoñ ko saath le kar us baaġ me ā pahuñchā. Wo apne saath Yahudī imaam aur phareesī ustaadoñ ke kuch paharedaaroñ ko bhī laayā thā. Wo log apne haathoñ me mashaaleñ, laalten aur hathiyaar liye hue the. ⁽³⁾

Īsā^(a.s) jaante the ki unke saath kyā hone waalā hai. Islie Īsā^(a.s) ne baahar nikal kar puchā, "Tum log kisko ɻhuñdh rahe ho?" ⁽⁴⁾ Un logoñ ne jawaab diyā, "Ham Naazreth ke Īsā ko ɻhuñdh rahe haiñ." Īsā^(a.s) ne unse kahā, "Maiñ hī wo huñ." (Yahudā, jo Īsā^(a.s) ko dhokā de rahā thā, waheeñ unke saath khađā huā thā.) ⁽⁵⁾ Jab Īsā^(a.s) ne kahā, "Maiñ hī wo huñ," to wo log peeche haṭe aur zameen par gir gae. ⁽⁶⁾ Īsā^(a.s) ne phir se puchā, "Tum kisko ɻhuñdh rahe ho?" Un logoñ ne kahā, "Ham Naazreth ke Īsā ko ɻhuñdh rahe haiñ." ⁽⁷⁾ Īsā^(a.s) ne unse phir kahā, "Maiñ tumko batā chukā huñ ki maiñ hī wo huñ. To agar tum mujhe hī ɻhuñdh rahe ho to in logoñ ko jaane do." ⁽⁸⁾ Ye sab is tarah se huā ki Īsā^(a.s) kī kahī huī har baat sach hone waalī thī: "Tune mujhe jitne bhī log die maine un sab kī hifaazat karī." ⁽⁹⁾

Janaab Shamun Patras ke paas talwaar thī. Usne wo talwaar nikaal kar imaam ke ġulaam par hamlā kar diyā jisse uskā ek kaan kaṭ gayā. (Us ġulaam kā naam malkhus thā.) ⁽¹⁰⁾ Īsā^(a.s) ne janaab Patras se kahā, "Apnī talwaar ko miyaan me rakh lo. Kyā jo zimmedaari Allaah taa'alā ne mujhe dī hai maiñ wo aňjaam nā duñ?" ⁽¹¹⁾ Un faujiyoñ aur Yahudī paharedaaroñ ne Īsā^(a.s) ko giraftaar kar ke baañdh diyā. ⁽¹²⁾ Aur pahale ek imaam ke paas le kar gae jiskā naam Anas thā. Anas us saal ke sabse bađe imaam, Kaaifā, kā sasur thā. ⁽¹³⁾ Kaaifā wahī ādmī thā jisne Yahudī logoñ se kahā thā, "Ye accħā hai ki purī qaum ke liye ek ādmī qurbaan ho jaae." ⁽¹⁴⁾

Janaab Patras aur Īsā^(a.s) kā ek dusrā shaagird bhī unke peeche-peechē saath gae the. Ye shaagird wo thā jo bađe imaam ko jaantā thā. To wo Īsā^(a.s) ke saath us imaam ke mahal ke āngan me chalā gayā. ⁽¹⁵⁾ Lekin janaab Patras waheeñ darwaaze ke baahar ruk kar iñtazaar karne lage. Wo shaagird jo bađe imaam ko jaantā thā añdar se baahar āyā. Usne darwaaze ke paharedaar se baat karī aur janaab Patras ko bhī apne saath añdar le gayā. ⁽¹⁶⁾ Darwaaze ke paas ek ġulaam lađkī ne janaab Patras se puchā, "Kyā tum bhī us ādmī ke shaagirdoñ me se ho?" Janaab Patras ne jawaab diyā, "Naheeñ, maiñ naheeñ huñ!" ⁽¹⁷⁾ Wo sardī kā waqt thā, islie naukroñ aur paharedaaroñ ne āg jalaaī thī. Wo uske chaaron̄ taraf khađe ho kar āg kī garmī le rahe the. Janaab Patras bhī unke saath khađe ho kar haath señkne lage. ⁽¹⁸⁾

Usī waqt, bađā imaam Īsā^(a.s) se unke aur shaagirdoñ ke baare me sawaal puch̄ rahā thā. ⁽¹⁹⁾ Īsā^(a.s) ne jawaab diyā, "Maine khuleaam logoñ se baat karī hai. Maine hameshā logoñ ko ibaadatagaahoñ me pađhaayā hai jahaan̄ Yahudī log jamā hote the. Maine kabhī bhī koī baat chupā kar naheeñ kahī. ⁽²⁰⁾ To tum mujh se sawaal kyuñ puch̄ rahe ho? Un logoñ se puc̄ho jin logoñ ne mujh se taaleem lī hai. Wo jaante haiñ jo maine kahā hai. ⁽²¹⁾ Jab Īsā^(a.s) ne ye kahā to wahaañ khađe ek paharedaar ne unko maarā. Us paharedaar ne kahā, "Kyā imaam se baat karne kā yahī tareeqā hai?" ⁽²²⁾ Īsā^(a.s) ne paharedaar se kahā, "Agar maine kuch galat kahā hai, to mujhe bataao usmeñ kyā galat hai, aur agar ye baat theek hai to tumne mujhe kyuñ maarā?" ⁽²³⁾ Tab Anas ne Īsā^(a.s) ko Kaaifā ke paas bhej diyā jo sabse bađā imaam thā. Un logoñ ne Īsā^(a.s) ko abhī bhī baañdh rakħā thā. ⁽²⁴⁾

Janaab Shamun Patras abhī bhī waheeñ āg kī garmī le rahe the. Unhone usse puchā, "Kyā tum is ādmī ke shaagirdoñ me se naheeñ ho?" Patras ne manā kar diyā aur kahā, "Naheeñ, maiñ naheeñ huñ." ⁽²⁵⁾ Bađe imaam kā ek ġulaam wahaañ maujud thā. Ye us ġulaam kā rishtedaar thā jiskā kaan janaab Patras ne kaaṭā thā. Us naukar ne puchā, "Kyā tumko maine us baaġ me inke saath naheeñ dekhā thā?" ⁽²⁶⁾ Janaab Patras ne phir se wahī jawaab diyā, "Naheeñ!" Usī waqt murge ne baañg dī. ⁽²⁷⁾

Uske baad wo log Īsā^(a.s) ko Kaaifā ke ghar se le kar Romī gawarnar ke mahal ke paas pahuñche. Us waqt tak subah ho chukī thī. Yahudī log us mahal me naheeñ jā rahe the kyuñki wo log apne āpko gañdā naheeñ karnā chaahte the. ^(b) Wo log fasah kī eid kā khaanā khaanā chaahte the. ⁽²⁸⁾ Islie Romī gawarnar jiskā naam Peelaatus thā, unse milne baahar āyā. Usne puchā, "Is ādmī ne kyā jurm kiyā hai?" ⁽²⁹⁾

Unhone kahā, "Ye gunaahgaar hai. Islie ham ise āpke paas laae haiñ." ⁽³⁰⁾ Peelaatus ne unse kahā, "Iskā faisla apne qaanun ke mutaabiq kħud hī karo. Un logoñ ne jawaab diyā, "Lekin hamko ijaazat naheeñ hai ki ham kisī ko maut kī sazā deñ." ⁽³¹⁾ Ye bilkul waise hī sach ho gayā ki jis tarah Īsā^(a.s) ne kahā thā ki unko qatl kiyā jaaegā. ⁽³²⁾ Tab

Peelaatus waapas mahal ke añdar chalā gayā. Us ne Īsā^(a.s) se añdar āne ke liye kahā aur unse puchā, "Kyā tum Yahudiyoñ ke baadshaah ho?"⁽³³⁾ Īsā^(a.s) ne jawaab diyā, "Kyā ye tumhaarā kħud kā sawaal hai yā tumheñ dusre logoñ ne mere baare me bataayā hai?"⁽³⁴⁾

Peelaatus ne kahā, "Kyā maiñ Yahudī huñ? Ye tumhaare kħud ke imaam aur log haiñ jo tumheñ mere paas laae haiñ. Bataao tumne kyā jurm kiyā hai?"⁽³⁵⁾ Īsā^(a.s) ne jawaab diyā, "Merī sultanat is duniyā kī naheeñ hai. Agar merī sultanat is duniyā kī hotī to mere sipaahioñ ne laq kar Yahudī rahanumaaon se mujhe bachā liyā hotā. Lekin merī sultanat is duniyā me se naheeñ hai."⁽³⁶⁾

Peelaatus ne phir se wahī kahā, "To tum baadshaah ho!" Īsā^(a.s) ne jawaab diyā, "Tum kahte ho ki maiñ baadshaah huñ, jo ek sach hai. Maiñ is kaam ke liye paidā kiyā gayā huñ: Ki logoñ ko sach batā sakuñ. Maiñ is duniyā me islie hī bhejā gayā huñ aur jo log sacche haiñ wo hī merī baat sunte haiñ.⁽³⁷⁾ Peelaatus ne kahā, "Sach kyā hai?" Ye sab kahne ke baad wo baahar Yahudiyoñ ke paas gayā. Usne unse kahā, "Is ādmī par lagaayā gayā jurm saabit naheeñ hotā ki jiske liye maiñ ise sazā sunaaun."⁽³⁸⁾ Tumhaare reetī-riwaaj ke mutaabiq maiñ fasah kī eid ke din tumhaare ek qaidī ko āzaad kartā huñ. Kyā tum chaahete ho ki maiñ is 'Yahudiyoñ ke baadshaah' ko āzaad kar duñ?"⁽³⁹⁾

Wo sabhī cheekh kar bole, "Naheeñ, isko naheeñ! Baraabbas ko āzaad kar do!" Baraabbas ek luṭerā thā.⁽⁴⁰⁾

19:1-6

Tab Peelaatus ne hukm diyā ki Īsā^(a.s) ko le jā kar kođe maare jaaeñ.⁽¹⁾ Faujeeeyoñ ne kuch kaañṭedaar jhaadiyoñ se ek taaj banaayā. Wo unke sar par lagaayā aur unko ek baiñgnī rañg kā kapdā pahanaayā.⁽²⁾ Tab wo Īsā^(a.s) ke paas kāī baar āe aur bole, "Yahudiyoñ ke baadshaah kī jay ho!" Unhone Īsā^(a.s) ke muñh par tamaache maare.⁽³⁾ Peelaatus phir baahar āyā aur kahā, "Dekho! Maiñ Īsā ko baahar lā rahā huñ. Aur maiñ tumko bataanā chahtā huñ ki mujhe usmeñ aisā kuch bhī naheeñ milā jiske liye maiñ use sazā duñ."⁽⁴⁾ Tab Īsā^(a.s) apne sar par kaañṭon kā taaj lagaaye aur chaaron taraf baiñgnī kapdā odhe hue baahar āe. Peelaatus ne Yahudiyoñ se kahā, "Ye rahā wo ādmī!"⁽⁵⁾ Jab waqt ke imaam aur uske paharedaaroñ ne Īsā^(a.s) ko dekhā to wo chillā-chillā kar kahne lage, "Isko saleeb par maut kī sazā do! Isko saleeb par maut kī sazā do!"⁽⁶⁾

[a] "Jab maiñ unke saath is duniyā me thā, maine unko tere naam se apne saath rakhā. Tere die hue logoñ me se koi bhī naheeñ bhaṭkā siwaay Yahudā Iskariyotī ke. Usko gunaah ne gher liyā taaki kalaam sach ho jaae." (Injeel : Yuhannā 17:12)

[b] Yahudī logoñ kā ye aqeedā thā ki agar wo ḡair-Yahudī logoñ ke ghar me jaaeñge, to wo naapaak ho jaaeñge aur wo phir fasah kī eid naheeñ manā sakte.